



Lëtzebuerg, 27. Juli 2020

Gemeinsame Communiqué vun den Organisatiounen, déi dat edukativt a psycho-sozialt Personal aus dem Lëtzebuurger Schoulwiese verrieden.

De Minister Claude Meisch brécht säi Wuert!

Eis edukativt a psycho-sozialt Aarbecht ass wäertvoll fir d'Kanner a fir déi Jugendlech a brauch endlech een entsprecheden am Sozialdialog ausgehandelten Aarbechtskader

No den Notes vum MENJE zur « *Envergure de la tâche du personnel éducatif et psycho-social intervenant auprès d'élèves à besoins spécifiques* » vum 3. Juli 2020 an zur « *Envergure de la tâche du personnel éducatif et psycho-social des SePAS et SSE* » vum 10. Juli 2020 kour et, no der Interventioun vun de Gewerkschaften, vu Säite vum Ministère duerch déi nei Note « *Compléments d'information - Envergure de la tâche du personnel éducatif et psycho-social* » vum 21. Juli 2020 zu engem deelweisen Zeréckrudderen a Bezuch op déi éischtgenannten Note vum 3. Juli 2020, allerdéngs net a Bezuch op déi Note, déi d'SePAS'en an d'SSE'e concernéiert.

Mir, déi concernéiert Gewerkschaften a Personalrepresentatiounen, bezéien heimat zesumme folgend Stellung zu der aktueller Situatioun:

- Mir si **shockéiert iwwert d'Art a Weis**, wéi de MENJE - ouni iergendeng Form vun deem esouguer gesetzlech virgesinnenen Dialog - einfach iwwert all d'Käpp ewech wichteg Entscheedungen zum Personal an zu deem senger Aarbecht probéiert ze fällen! De Minister probéiert säi ganzt edukatiivt a psycho-sozialt Personal virun ee Fait accompli ze stellen, an dat ausgerechent den 13. Juli no enger Phase vun aussergewéinlech Engagement vum ganze Personal während der Pandemie! **Dat ass kee Respekt a kee Sozialdialog!**
- Mir ënnersträichen, datt **déi festgehalen Aarbechtsbedingungen** total laanscht d'Ufuerderunge vum Terrain ginn, an **net fir eng qualitativ Aarbecht am Sënn vun de concernéierte Kanner a Jugendlechen an eisem ganze Schoulwiese suergen!**
- Mir stellen déi **haarsträubend Interpretatiounen vum Aarbechtsgesetz** duerch de MENJE, souwéi d'Rechtméissegkeet vun dësen Notes staark a Fro a behalen eis hir juristesche Präiwung vir!
- Mir wëlle **keng Zwouklassegesellschaft fir dat edukatiivt a psycho-sozialt Personal am Enseignement**; mir wëllen net, datt eis jonk Kolleegen a Kolleginnen nach méi schlecht Aarbechtsbedingungen operluecht kréien ewéi déi Leit, déi aktuell schonn agestallt sinn!

- Mir sinn **net averstanen, datt d'Aarbechtskonditiounen vu laangjärege Mataarbechter drastesch verschlechtert ginn, wann si hir Aarbechtsplaz innerhalb vun der Educatioun wiesselen wëllen!**
- Mir sinn der Iwwerzeugung, datt **d'Aarbechtskonditiounen eng qualitativ gutt Aarbecht bei alle Schüler a Schülerinnen erméiglechen müssen** an dëst ganz besonnesch bei den Élèves à besoins éducatifs spécifiques, esou wéi bei alle Schüler a Schülerinnen, déi eng psychosozial Ënnerstëtzung an/oder eng spezifesch schoulesch Begleedung brauchen! Mir brauchen Aarbechtskonditiounen, déi et eis erméiglechen, den Uspréich vum **Bildungsauftrag, wéi en am Artikel 24 vun der UN-Behindertenrechtskonvention fir Kanner a Jugendliche mat spezifesche Besoinen virgesinn ass**, gerecht ze ginn.

Dofir fuerdere mir de Minister Claude Meisch op

- déi **3 Notes integral zeréckzeéien** an **endlech ee Sozialdialog** fir eng adequat Tâchendefinitioun a -beschreiwung unzeefänken; bis dohinner sollen déi aktuell Aarbechtskonditiounen gëllen;
- **sech selwer deenen Diskussiounen am Kader vun engem Sozialdialog ze stellen**, amplaz seng Chefs de service virzeschécken;
- säi Versproochen anzehalen an **ze legiferéieren**, esou wéi hien dat a senger Äntwert vum 18. März 2019 op d'Question parlementaire N° 219 vum 17. Januar 2019 versprach huet;
- **d'Aarbechtskonditiounen vum Personnel EPS net ze verschlechteren**, esou wéi hien et schrëftlech an enger Lettre ministérielle vum 3. August 2018 versprach huet;
- **dem Personal keng Avenante méi virzeleeën**, fir hir Aarbechtskonditiounen ze änneren an domat an der Reegel dann ze verschlechteren!

Amplaz d'Aarbechtskonditiounen vum edukativen a psycho-soziale Personal am Enseignement vun uewenerof ze bradéieren, soll de Minister Claude Meisch säi Wuert halen an – endlech – mat alle Sozialpartner schwätzen a legiferéieren!

MATGEDEELT VUN ALEE/CGFP, SLEG/CGFP, SPEBS/CGFP, APPSAS, APCCA/SEW/OGBL